

Dieta annuala dal Forum economic mundial WEF 2024 – Infurmaziuns impurtantas

Las autoritads da la Confederaziun, dal chantun Grischun e da la vischnanca da Tavau infurmeschan en moda cuntuanta ed objectiva davart lur tenuta envers la Dieta annuala dal Forum economic mundial WEF 2024 a Tavau. Las suandantas explicaziuns davart la Dieta annuala dal WEF derivan da las differentas autoritads e dals differents posts involvids.

Dieta annuala dal Forum economic mundial WEF 2024 a Tavau

1. Infurmaziuns generalas

A la Dieta annuala dal Forum economic mundial a Tavau dals 15 fin ils 19 da schaner 2024 vegni fatg quint cun passa 2500 participantas e participants da l'economia, da la politica, da la scienza e da la cultura, che sa trategnan durant plirs dis a medem temp a Tavau. 200 fin 300 da quels èn persunas protegidas dal dreitg internaziunal, sco scheffas e chefs da stadi e da regenza, ministras e ministers sco er represchentantas e represchentants d'aut rang d'organisaziuns internaziunalas. Circa 400 collavuraturas e collavuraturs da medias naziunalas ed estras rapportan sur da l'eveniment a Tavau.

Dapli infurmaziuns davart il motto e davart il program da la Dieta annuala dal WEF 2024 sin <https://www.weforum.org/events/world-economic-forum-annual-meeting-2024/>

2. Significaziun

La Dieta annuala dal Forum economic mundial è ina da las occurrentzas da la politica economica e sociala las pli impurtantas dal mund. A chaschun da la 50. Dieta annuala il schaner 2020 a Tavau han il Cussegl federal, la Regenza dal chantun Grischun e la suprastanza da la vischnanca da Tavau punctuà explicitamain la valur da questa occurrenza per la Svizra. Tenor lur avis èsi fitg positiv da dar alloschi a quest forum, nua ch'i vegnan barattadas opiniuns e tschertgadas soluziuns, e da cuntinuar uschia cun la lunga tradiziun da la Svizra sco pajais ospitant per conferenzas e per scuntradas internaziunalas.

La radunanza annuala da las represchentantas e dals represchentants da l'economia, da la politica, da la scienza e da la cultura a Tavau porscha la pussaivladad da tgirar en Svizra en in rom spezial il contact cun bleras persunalitads d'autas posiziuns. En la vischnanca da Tavau sa basan numerusas plazzas da laver sin ils effects da congress e d'autras occurrentzas per l'economia publica e quellas e quels da Tavau èn s'exprimids repetidamain en differentas votaziuns dal pievel en moda positiva envers il WEF ed envers lur rolla d'ospitant.

3. Custo e niz

Ils custs supplementars per la segirezza da la Dieta annuala dal WEF 2024 importan previsiblament tut en tut circa 9 milliuns francs.

Sco gia durant ils onns precedents sa participescha la Confederaziun ensemencun la Fundazion WEF e cun ses ulteriurs partenaris (chantun Grischun, vischnanca da Tavau) – en il rom d'in model da finanziaziun da trais stgalims – als custs per las mesiras da segirezza da las Dietas annualas dal WEF 2022–2024. Ils partenaris da finanziaziun surpiglian las suandantas parts da quests custs: WEF 3/8, Confederaziun 2/8, chantun Grischun 2/8, vischnanca da Tavau 1/8. A la contribuziun da la vischnanca da Tavau sa participescha la vischnanca da Claustra cun 100 000 francs.

Ils detagls concernent la finanziaziun èn reglads en la «Missiva tar il Conclus federal davart l'engaschament da l'Armada en servetsch d'assistenza per sustegnair il chantun Grischun tar las mesiras da segirezza e tar il Conclus federal davart la participaziun da la Confederaziun a la finanziaziun da las mesiras da segirezza en il rom da las Dietas annualas dal Forum economic mundial 2022–2024» (Fegl uffizial federal 2021 435).

Il model da trais stgalims per finanziar ils custs da segirezza vegn applitgà da princip dapi l'onn 2004:

Stgalim 1

La limita dals custs per las expensas da segirezza importa 9 milliuns francs per onn. Ils partenaris surpiglian las suandantas parts da quests custs:

Partenaris	Import en francs	Part
WEF	3,375 miu.	3/8
Confederaziun	2,25 miu.	2/8
Chantun Grischun	2,25 miu.	2/8
Vischnanca da Tavau	1,125 miu.	1/8
Limita da custs	9 miu.	

Stgalim 2

Sche la limita dals custs vegn surpassada per motivs spezialis, vegn applitgà il stgalim da finanziaziun 2. In surpassament da la limita dals custs po per exemplu resultar per ils suandants motivs:

- in dumber extraordinariam grond da persunas protegidas tenor il dretg internaziunal sa participescha a curta vista a la Dieta annuala dal WEF
- adattaziuns pli grondas a curta vista vi dal concept da dieta dal WEF
- augment signifigant dals custs d'alloschi per il persunal da segirezza extrachantunal
- extensiun da la zona da segirezza a Tavau pervia dal dumber da persunas da proteger
- custs supplementars pervia da l'aura.

En in tal cas metta la Confederaziun a disposiziun – per tut las trais Dietas annualas dal WEF da la perioda 2022–2024 – meds finanzials supplementars da tut en tut maximalmain 900 000 francs per ils custs da segirezza che surpassan la limita dals custs da 9 milliuns francs per Dieta annuala dal WEF. Expensas dal stgalim 2 che surpassan questa summa veggan repartidas tenor la clav da repartizion dal stgalim 1, nun ch'il stgalim 3 veggia applitgà.

Stgalim 3

En cas d'eveniments extraordinaris (p.ex. attatgas terroristicas, attentats, smanatschas massivas u indizis concrets da commetter acts da violenza) surpiglia la Confederaziun 80 pertschient dals custs da segirezza che surpassan ils stgalims 1 e 2. Ils 20 pertschient restants veggan surigliads dal chantun Grischun, da la vischnanca da Tavau e dal WEF.

L'engaschament da l'Armada en il servetsch d'assistenza vegg finanzià sur il preventiv ordinari dal Departament federal da defensiun, protecziun da la populaziun e sport. Per l'engaschament da l'Armada a favur dal WEF poi vegin fatg quint tut en tut circa cun ils custs che resultassan, sche las unitads participadas prestassan lur curs da repetiziun regulars. Il preventiv annual per las acziuns da l'Armada a chaschun da la Dieta annuala dal WEF 2022–2024 importa 32 milliuns francs. Ils custs per las acziuns da l'Armada al WEF 2020 (29,74 miu. fr.) ed al WEF 2022 (21,4 miu. fr.) èn stads sut quest preventiv.

Il Forum economic mundial è ina fundaziun. Durant l'onn finanziar dal fanadur 2022 fin il zercladur 2023 ha ella fatg ina svieuta da 409 milliuns francs. Per questa perioda n'ha ella preschentà nagin surpli.

4. Segirezza

A la Dieta annuala dal WEF a Tavau collavuran differents servetschs da la Confederaziun, dal chantun, da la vischnanca da Tavau e dal WEF. La coordinaziun è chaussa da la Giunta dal WEF da la Regenza grischuna (www.wef.gr.ch) sut la direcziun dal cusseglier guovernativ Marcus Caduff. La Polizia chantunala dal Grischun sco er ses partenaris procuran per la segirezza da las visitadoras e dals visitaders da la Dieta annuala dal WEF, da la populaziun indigena e dals giasts.

Durant la Dieta annuala dal WEF a Tavau è la Polizia chantunala dal Grischun responsabla per in dispositiv che resguarda smanatschas per la segirezza. Questas smanatschas han consequenzas er ordaifer ils cunfins chantunals. Quai na sa mida er betg durant la Dieta annuala 2024. L'analisa da la situaziun da segirezza per las proximas Dietas annualas dal WEF ha mussà, ch'in vast dispositiv da segirezza è indispensabel, per che la Svizra possia ademplir sias obligaziuns da protecziun dal dretg internaziunal.

Per mantegnair la segirezza e per proteger persunas ed objects sa participeschan tut ils chantuns da la Svizra en il rom d'ina acziun interchantunala da la polizia. Las Chombras federalas han plinavant permess acziuns da segirezza subsidiaras a favur dal chantun Grischun cun maximalmain 5000 appartegnentas ed appartegnents da l'Armada per ils onns 2022–2024 (www.armee.ch/wef).

La Confederaziun è responsabla per dus secturs da segirezza:

- Per la segirezza da las persunas da l'exterior ch'èn protegidas tenor il dretg internaziunal – sco scheffas u chefs da stadis, scheffas u chefs da regenzas e commembraas e commembers da regenzas en uffizi – ordinescha il Servetsch federal da segirezza sche necessari mesiras da protecziun spezialas. Sco il dispositiv da segirezza general vegnan quellas garantidas da la Polizia chantunala dal Grischun e da ses partenaris.
- Per segirar il spazi d'aria e per mantegnair la suveranitad aviatica ha il Cussegl federal relaschè restricziuns per il spazi d'aria sur Tavau. Sut tschertas cundiziuns dastga il traffic aviatic civil traversar er vinavant il spazi d'aria restrenschi, sch'el è annunzià ed identifitgà ordavant. Responsabla per la permissiun è l'Aviatica militara. En cas da basegn vegnan mesiras da la polizia aviatica ordinadas e realisadas tenor las reglas e proceduras internaziunalas. Ultra da quai sto er vegnir reglà durant la Dieta annuala dal WEF il traffic aviatic da helicopters per Tavau. Pertutgads da restricziuns èn er paragsuladers, dronas, eroplans da model e.u.v. (guardar www.bazl.admin.ch sco er www.wef.gr.ch sut la rubrica FAQ).

5. Libertad d'opiniun e libertad da demonstrar

Las autoritads da la Confederaziun e dal chantun Grischun considereschan il Forum economic mundial sco lieu dal dialog avert. En il rom da la Dieta annuala dal WEF duai er esser pussaivel da discutar dumondas criticas davart la globalisaziun e davart il svilup da l'economia mundiala. Las autoritads spetgan dentant, che las criticras ed ils critichers preschentian lur quitads, lur arguments e lur propostas en moda paschaivla.

Las autoritads grischunas èn da princip prontas da permetter er l'onn 2024 ina demonstraziun sin dumonda. Quai sut la premissa, che las cundiziuns necessarias per la protecziun dals umans, da l'infrastructura e dals edifizis vegrnan resguardadas.

Per realisar ina demonstraziun ston ils organisaturs far cunvegnientschas detagliadas cun las autoritads. En quest connex ston vegnir resguardads ils basegns da la populaziun indigena, dals giasts da vacanzas e dals giasts dal di sco er dal traffic. In'eventuala dumonda da demonstraziun sto perquai vegnir inoltrada uschè baud sco pussaivel (guardar www.wef.gr.ch sut la rubrica FAQ).

Sch'igl avess da dar ina demonstraziun betg permessa, prendessan las autoritads – en il rom dal princip da commensurabladad – las mesiras necessarias per garantir la segirezza e la libertad da sa mover da las persunas indigenas e dals giasts. Persunas che commettan malfatgs vegrnan persequitadas consequentamain.

La limita da toleranza da la polizia suonda la pratica ch'è sa cumprovada ils ultims onns: En cas da violaziuns da leschas vegni intervegni adequatamain, per uschia metter clers segns cunter la violenza. La strategia cumprovada da trais stgalims (dialog, deescalaziun, intervenziun) duai perquai vegnir applitgada er en l'avegnir en il rom da la commensurabladad.

Per infumar las medias e la populaziun en moda averta e cumplessiva mainan las autoritads grischunas, en collavuraziun cun la Confederaziun e cun la vischnanca da Tavau, in center da medias extern e tgiran la pagina d'internet www.wef.gr.ch.

6. Consequenzas per il turissem

Il turissem en la regiun Tavau / Partenz n'è durant tut il WEF da princip betg restrenschi. I na dat naganas restricziuns da viagiar generalas. Tavau è cuntanschibel cun il traffic public u cun il vehichel privat.

Sin tut las vias d'access per Tavau datti controllas preventivas da persunas, da vehichels e da bagascha. En emprima lingia sa tracti d'evitar che objects privlus vegnian manads a Tavau. Las controllas vegnan fatgas per proteger las participantas ed ils participants dal congress, la populaziun sco er ils giasts. Las autoritads grischunas garanteschan, che las controllas sin las vias d'access per Tavau hajan lieu per tut las persunas pertutgadas senza schicanas ed en moda speditiva. Tuttina na poi betg vegnir exclus, ch'i po dar temps da spetga.

Infurmaziuns supplementaras davart la situaziun actuala da traffic e da viadi stattan a disposiziun sin www.rhb.ch, sin www.strassen.gr.ch e sin www.sbb.ch/fahrplan/bahnverkehrsinformation.html.

Entaifer la vischnanca da Tavau datti territoris cun restricziuns d'access durant la Dieta annuala dal WEF. Quai èn las zonas da protecziun tar il Center da congress / hotel Kongress / hotel Hilton Garden Inn, tar ils hotels «AlpenGold Hotel» e «Belvédère», tar il stadion da glatsch sco er tar il heliport Lago cun «Seeparkplatz» e «Seewiese» (guardar www.wef.gr.ch sut la rubrica FAQ). Las persunas che abitan en questas zonas da protecziun survegnan in badge ed ina vignetta per lur vehichel (hotline da la Polizia chantunala grischuna: +41 81 257 58 15). Tut ils auters hotels e tut las autres fatschentas èn cuntanschibels senza restricziuns.